

Malu = Bon; Bon = Malu

Porfin e dia tan sperá a yega! Ora 12 ‘or di anochi a bati dia 31 di mart, un era nobo a habri na nos pais madre. Awor Hulanda ta e úniko pais na mundu unda homoseksualnan por kasa legalmente i gosa tur e benefisionan di matrimonio. Leinan di penshon, erensia, belasting i divorsio ta apliká na parehanan homoseksual méskos ku parehanan heteroseksual. I méskos ku parehanan heteroseksual, nan tambe por adoptá muchanan despues di biba huntu pa tres aña. Asta dikshonario hulandes a kambia definishon di matrimonio, eliminando e parti ku matrimonio ta konsistí di ún hòmber i ún muhé.

Segun reportahe di CNN dia 31 di mart, alkade di Amsterdam, Job Cohen, (ku mas gobernante presente) lo ofisialisá na kasamentu di tres pareha maskulino i ún pareha femenino dia 1 di aprel. E seremonio lo wòrdu transmití bibu i direkto pa habitantenan lokal.

Na sèptèmber di aña pasá, parlamento hulandes fásilmente a aprobá e lei nobo. Enkuestanan ta indiká ku 75 porshento di e poblashon hulandes ta aprobá di kasamentu homoseksual.

Ma en realidat, kiko opinion di hende ta bal; kiko voto di parlamentarionan ta bal? **Ta ún opinion so ta konta...esei ta opinion di Dios.** I Dios ta yama homoseksualidat piká.

E lei nobo na Hulanda no ta nada straño. E ta un síntoma mas di e enfermedat ku tin e pais aki den su gara. E pais aki tin reputashon di aseptá komportashon kontrario di normanan i balornan di nos Kreador. Prostitushon awor ta legal. Matamentu di sernan humano ta sosodé diariamente sin konsekuensia pa e dòkter asesino (eutanasia). Benta di siertu droga ta tolerá na koffiehuis. Hopi hulandes **ta igualá malu ku bon.**

Ma no laga nos aploudí nos mes, keriendo ku nos ta santu kompará ku Hulanda. **Kua di e Dies Mandamentu nos no ta ignorá òf kibra abiertamente sin kurpa kohe rel?**

Nos ta usa nòmber di Dios pornada tur dia sin pensa. Tantu mucha no sa mes kiko ke men “*onra bo tata i bo mama*”. I pa ser franko, tantu mayor no ta meresé e rèspèt di nan yunan. Gañamentu ta un hábito, un parti masha normal di nos bida. Nos ta kudishá sin sa, i trankil ta kohe kos di hende si nos ta pensa ku otro hende lo no haña sa. Nos ta kometé tur klase di inmoralidat.

Nos lo pensa ku “*no mata*” sigur lo ta un mandamentu ku nos lo respetá. Ma asta esei no ta e kaso. Matamentunan kruel ta tuma lugá ku regularidat na nos islanan. Maske tur hende sa ku nan ta sosodé, ningun hende—ni suidadano, ni gobernante—ta protestá e asesinatnan ilegal. Ademas, e ta kubrí ku un kapa di sekresia. E outoridatnan konserní no ke pa hende sa di e matansa kruel di beibinan indefenso promé ku nan ta nase. Ma hopi hende ta konsiderá maldita aborto algu bon!

Beibel ta advertí, “*Ai di esnan ku ta yama loke ta malu, bon, i loke ta bon, malu, loke ta skuridat, lus, i loke ta lus, skuridat, loke ta marga, dushi, i loke ta dushi, marga*” (Isaias 5:20).

Hende ta insistí pa haña nan gana. Nan ta respetá ni lei di pais ni Palabra di Dios. Asta hende religioso. Nan ta bai misa djadumingu pa kumindá Dios un ratu, anto sobrá di siman ta biba manera nan mes ta haña ta bon na lugá di obedesé Dios. Pa nan, malu ta bon. Hopi di esnan ku ta papia asina elokuyente di normanan i balornan ta ignorá nan mes spich por kompleto den bida diario. Nan mes ta duna un mal ehèmpel pasobra nan tambe ke hòrta short. No por!

Segun Dios Su perspectiva malu ta malu, i semper lo keda malu; i bon ta bon i semper lo keda bon. Pesei Skritura ta bisa, “*Aboresé loke ta malu; tene firme na loke ta bon*” (Romanonan 12:9). Serka Dios, no tin espasio pa hasi wega ku loke ta bon i loke ta malu, yamando bon, malu, i malu, bon.